

## PERANAN MASJID MASA KINI:SATU PENILAIAN BERKAITAN DENGAN KEDUDUKANNYA SEBAGAI WADAH KEPIMPINAN RAJA<sup>(\*)</sup>

Oleh

Dr. Abdurrahman Raden Aji Haqqi<sup>(\*\*)</sup>

### MUQADDIMAH

Al-Mawardi (w. 450H) dalam kitabnya *al-Ahkam al-Sultaniyyah wa al-Wilyah al-Diniyyah* ada menyenaraikan 10 tugas khalifah di mana yang pertamanya adalah “Memelihara al-Din mengenai asas-asas (usul) yang tetap dan juga tentang perkara perkara yang telah disepakati (ijma’) oleh golongan Salaf al-Ummah [umat Islam terawal]. Jika sekiranya muncul seorang yang mengadakan bid’ah dalam agama, atau seorang penyeleweng yang meragukan, maka adalah menjaditugasnya untuk menjelaskan keterangan serta menerangkan yang sebenar, di samping ia harus menjalankan segala hak-hak dan hukumannya agar terpelihara dari kerosakan dan orang ramai terhindar dari penyelewengan.”<sup>1</sup>

Masjid sebagai salah satu simbol utama dan mercu tanda agama Islam adalah termasuk dalam tugas khalifah di atas dalam membangun, mentadbir, mengurus dan mengimarahkannya demi pemeliharaan kesucian dan kemuliaannya. Perkara ini dijelaskan lagi oleh al-Mawardi di dalam kitabnya itu dalam Bab Kesembilan mengenai perlantikan imam sembahyang di mana beliau membahagikannya kepada tiga bahagian iaitu imam sembahyang lima waktu; imam sembahyang Jum’at; dan imam sembahyang sunat.<sup>2</sup> Sebagaimana dimaklumi imam sembahyang berkaitan dengan masjid.

Oleh kerana masjid dalam sejarah Islam tidak pernah dipisahkan dari tugas-tugas kepimpinan negara sama ada ia digelar khalifah, amirul mukminin, imam, sultan atau

---

<sup>(\*)</sup> Kertas kerja dibentangkan dalam Seminar Institusi Masjid anjuran Jabatan Perdana Menteri Negara Brunei Darussalam, 19-21 Julai 2004, Pusat Persidangan Antarabangsa (ICC), Berak as.

<sup>(\*\*)</sup> Pensyarah, Jabatan Syariah Institut Pengajian Islam Sultan Haji Omar Ali Saifuddien, Universiti Brunei Darussalam.

<sup>1</sup> Abu al-Hasan Ali bin Muhammad al-Mawardi, *al-Ahkam al-Sultaniyyah wa al-Wilyah al-Diniyyah*, terj. Uthman bin Hj Khalid (Kuala Lumpur: Institut Pengajian Tradisional Islam, 1989), hal. 23.

<sup>2</sup> Ibid. hal. 171.

raja,<sup>3</sup> maka masjid mempunyai peranan yang penting dalam perjalanan sesebuah kerajaan Islam. Hakikat ini merupakan kesinambungan amalan yang telah dicontohkan oleh Baginda Rasulullah Sallallahu alaihi wasallam di mana “masjid pada zaman hayat Baginda Rasulullah Sallallahu ‘Alaihi wa Sallam merupakan pusat pentadbiran, sumber keadilan, markas ketenteraan, gedung ilmu pengetahuan, sumber bantuan dan pertolongan, tempat perlindungan dan berteduh, pusat kegiatan masyarakat dan dakwah Islam, pusat dan tempat beribadat, bertahajud dan sujud kepada Allah Subhanahu wa Ta’ala, ianya merupakan pusat menghubungkan antara manusia dan manusia, dan manusia dengan Allah Subhanahu wa Ta’ala.”<sup>4</sup>

Demi pemfokusan kajian dalam kertas kerja ini, setelah muqaddimah akan dibincangkan peranan masjid dalam gambaran umum kemudian diikuti dengan peranan masjid masa kini dan peranan imam dalam masyarakat dan dilanjutkan dengan satu penilaian berkaitan dengan kedudukannya sebagai wadah kepimpinan raja serta diakhiri dengan sebuah penutup.

## PERANAN MASJID: GAMBARAN UMUM

Walaupun perkataan ‘masjid’ sudah diketahui umum secara jelas maksudnya akan tetapi apabila kita merujuk beberapa kamus bahasa dari pelbagai bahasa kita akan menjumpai beberapa kemosykilan untuk membenarkan definisi masjid. Ini disebabkan, menurut hemat penulis, oleh keumuman definisi tersebut. Sebagai contoh, *Kamus Dewan* mentakrif masjid dengan “bangunan khas tempat orang Islam beribadat.”<sup>5</sup> Salah satu kemosykilannya, definisi ini boleh diaplikasikan kepada sebuah kedai yang dimaksudkan untuk perniagaan dengan niat beribadat kerana dalam Islam perniagaan juga termasuk amalan ibadat.<sup>6</sup> Jadi kedai boleh dianggap masjid kerana ia merupakan bangunan khas tempat peniaga muslim beribadat dalam bentuk perniagaan.

<sup>3</sup> Rujuk Abdul Hamid Mutawalli, *Mabadi' Nizam al-Hukm fi al-Islam*, cet. 4 (Iskandariyyah: Mansha'ah al-Ma'arif, 1978), hal. 131-33.

<sup>4</sup> Awang Mahmud Saedon bin Awang Othman (Dato Paduka Seri Setia Profesor Dr. Haji), *Jejak -jejak... Penyelenggara Prof. Madya Dr. Awang Haji Hashim bin Haji Abd. Hamid* (Gadong: Akademi Pengajian Brunei, UBD, 2003), hal. 228.

<sup>5</sup> Dewan Bahasa dan Pustaka, *Kamus Dewan* (Kuala Lumpur: Dewan Bahasa dan Pustaka, 1989), hal. 805.

<sup>6</sup> Ibadat dalam *Kamus Dewan* ditakrif dengan “bakti (khidmat) kepada Tuhan, perbuatan dan amalan yang dilakukan sebagai bakti kepada atau kerana Tuhan (seperti sembahyang, berdoa, bersedekah, berbuat baik sesama manusia dan lain-lain)

Sebaliknya, dalam sebuah kamus berbahasa Arab definisi masjid lebih sempit lagi iaitu ”مَكَانٌ يُصْلِي فِيهِ النَّاسُ جَمَاعَةً” atau “satu tempat di mana orang-orang melaksanakan sembahyang berjemaah.”<sup>7</sup> Ini bermakna secara harfiyyah masjid adalah satu tempat untuk sembahyang berjamaah saja dan ia hanya digunakan untuk sembahyang, tidak lain. Di dalam kamus berbahasa Inggeris, masjid ditakrif sebagai ‘*Islamic place of worship*’<sup>8</sup> Definisi ini lebih kurang menyerupai definisi versi bahasa Melayu walaupun ia lebih luas lagi kerana bukan hanya ‘bangunan khas’ akan tetapi ‘tempat’, ‘place’ yang bersifat Islam.

Walaubagaimanapun, demi mengelakkan perbincangan panjang lebar mengenai definisi masjid, pengertian masjid dalam kertas kerja ini adalah seperti yang ditakrifkan *Akta Majlis Ugama Islam dan Mahkamah-mahkamaha Kadi Penggal 77* (Selepas ini dipanggil *Akta*) iaitu “sebuah bangunan yang didirikan atau digunakan bagi maksud mengadakan sembahyang, perkhidmatan-perkhidmatan dan lain-lain upacara yang berkaitan dengan ugama Islam, dan termasuk sebuah surau.”<sup>9</sup>

Daripada tafsiran undang-undang di atas yang dimaksudkan dengan masjid adalah:

- 1- berupa sebuah bangunan.
- 2- bangunan tersebut didirikan atau digunakan bagi maksud mengadakan sembahyang, perkhidmatan-perkhidmatan dan lain-lain upacara yang berkaitan dengan agama Islam.
- 3- masuk dalam pengertian masjid adalah surau dan balai ibadat.

Di dalam al-Quran, kata ‘masjid’ sama ada dalam bentuk kata tunggal atau jamak diulang penyebutannya sebanyak 28 kali. Apabila ia dicampur dengan perkataan lain seperti ‘ṣaf’, ‘bait’ dan ‘ḥāfiẓ’ yang dimaksudkan masjid maka jumlah penyebutannya menjadi 46 kali.<sup>10</sup>

<sup>7</sup> ASESCO, *al-Liġiż li l-Arabi al-Asasi* (Tunis: Larousse, 1989), hal. 608.

<sup>8</sup> Webster’s – New Dictionary and Thesaurus (USA: DS Max USA, 1995), hal.254

<sup>9</sup> Bab 2.

<sup>10</sup> Rujuk *Faḍīlat al-Maqdīsī*, *Fath al-Rahmān li Talib Ayat al-Qurān* (Beirut: Dar al-Fikr, 1409H/1989M)

Adapun peranan masjid secara umum yang boleh diambil dari jumlah ayat al-Quran di atas kemudian dilaksanakan oleh Baginda Rasulullah Sallallahu ‘alaihi wasallam di Masjid Nabawi selama hayat Baginda adalah:

1. Tempat ibadah (shalat, zikir).
2. Tempat konsultasi dan komunikasi (masalah ekonomi-sosial budaya).
3. Tempat pendidikan.
4. Tempat kebajikan masyarakat.
5. Tempat latihan ketenteraan dan persiapan alat-alatnya.
6. Tempat pengubatan para korban perang.
7. Tempat perdamaian dan pengadilan sengketa.
8. Dewan dan tempat menerima tetamu.
9. Tempat menawan tahanan, dan
10. Pusat penerangan atau pembelaan agama.<sup>11</sup>

Manakala Prof.Ahmad Shalaby telah menggariskan peranan institusi masjid semenjak zaman Rasullulah adalah seperti berikut: ia adalah tempat melakukan ibadat, tempat bermesyuarat, mahkamah menjatuhkan hukuman, institusi pengajian, balai pertemuan, tempat kegiatan kesusasteraan, tempat perbincangan mengenai perihal ekonomi dan perdagangan dan tempat memutuskan urusan negara. Sidi Gazalba pula menyimpulkan institusi masjid di dalam Islam adalah pangkal tolak dan penghujung dari setiap segi kehidupan mereka.Dari keterangan di atas adalah tidak salah idealisme politik dibincangkan di dalam masjid tetapi ia mestilah berasaskan kepada nilai ketakwaan dan masjid tidak boleh sama sekali mengadakan kegiatan atau aktiviti kemasyarakatan (termasuk politik) yang boleh membawa perpecahan umat Islam.<sup>12</sup>

Allahyarham Dato Profesor Mahmud Saedon menulis “menjad kenyataan sejarah bahawa masjid pada zaman Baginda Rasulullah Sallallahu ‘Alaihi wasallam merupakan pusat ibadat dan muamalat, pusat penyebaran Islam, pusat pemerintahan dan pentadbiran, gedung ilmu pengetahuan, khazanah hikmat dan pusat pembentukanakhlik juga merupakan pusat kegiatan yang mendatangkan manfaat kepada Islam dan umatnya.

---

<sup>11</sup> Lihat M. Quraish Shihab (Dr.), *Wawasan al-Quran Tafsir Maudhu'i atas Pelbagai Persoalan Umat* (Bandung: Mizan)

<sup>12</sup> Zakaria Stapa, *Fungsi dan Kegunaan Masjid Simbol Perpaduan Ummah*

Ianya juga merupakan mahkamah tempat perbicaraan, dewan muzakarah dan syura untuk menentukan dasar negara, perang dan damai.”<sup>13</sup>

Nampaknya masjid pada masa silam mampu berperan sedemikian luas, disebabkan antara lain oleh:<sup>14</sup>

1. Keadaan masyarakat yang masih sangat berpegang teguh kepada nilai, norma, dan jiwa agama.
2. Kemampuan pengurus-pengurus masjid menghubungkan kondisi sosial dan keperluan masyarakat dengan uraian dan kegiatan masjid.

Peranan masjid di atas merupakan pengamalan yang nyata terhadap ajaran al-Quran dalam sebuah ayatnya yang berbunyi:<sup>15</sup>

إِنَّمَا يَعْمَلُ مسجِدُ اللَّهِ مِنْ عَامِنَ بِاللَّهِ وَالْيَوْمِ الْآخِرِ وَأَقَامَ الصَّلَاةَ وَعَاتَى الزَّكُوَةَ وَ

لَمْ يَخْشِ إِلَّا اللَّهُ فَعْسَى أُولَئِكَ أَنْ يَكُونُوا مِنَ الْمُهْتَدِينَ

Tafsirnya “hanyasanya yang layak mentakmirkan (menyemarakkan) masjid-masjid Allah itu ialah orang-orang yang beriman kepada Allah dan hai Akhirat serta mendirikan sembahyang dan menunaikan zakat dan tidak takut melainkan kepada Allah, (dengan adanya sifat-sifat yang tersebut) maka adalah diharapkan mereka termasuk dalam golongan yang mendapat petunjuk.” Pengertian perkataan ‘ya’muru’ (mentakmir, menghidupkan, menyemarakkan) dalam ayat ini sangat luas. Ia, sebagaimana dari sudut pengertian bahasanya, dimaksudkan dengan ibadat kepada Allah di dalam masjid-masjid secara umum dan dimaksudkan ibadah khusus yakni umrah bagi al-Masjid al-Haram. Ya’muru juga boleh diertikan dengan melazimkan diri di masjid atau berkhidmat kepadanya secara fizikal atau membangun sebuah masjid dan mengubahsuai. Semua pengertian ini boleh diterima dalam ayat ini kerana indikasi bahasanya dan juga ayat ini bertujuan untuk menjelaskan perkara berkenaan. Di dalam ilmu usul al-fiqh, penggunaan kata mushtarak terhadap semua ertiannya yang bersesuaian adalah dibenarkan seperti pandangan Imam Shafii.<sup>16</sup>

<sup>13</sup> Jejak-jejak..., hal. 226

<sup>14</sup> Quraish, *Wawasan al-Quran*

<sup>15</sup> Surah al-Taubah: 18.

<sup>16</sup> Lihat Muhammad al-Sais, *Tafsir Ayat al-Ahkam* (Kaherah: Muhammad Ali Shubaih , tt), jld. iii, hal. 19.

## PERANAN MASJID MASA KINI

Di dalam Muktamar Risalatul Masjid di Makkah pada tahun 1975, peranan masjid telah dibincangkan dan disepakati bahawa suatu masjid baru boleh dikatakan berperan secara baik apabila memiliki ruangan, dan peralatan yang memadai untuk:

- a. Ruang shalat yang memenuhi syarat-syarat kesihatan.
- b. Ruang-ruang khusus wanita yang memungkinkan mereka keluar masuk tanpa bercampur dengan pria baik digunakan untuk shalat, maupun untuk Pendidikan Kesejahteraan Keluarga (PKK).
- c. Ruang pertemuan dan perpustakaan.
- d. Ruang klinik kesihatan, dan ruang untuk memandi dan mengkafan mayat.
- e. Ruang bermain, bersukan, dan berlatih bagi remaja.

Semua hal di atas harus diwarnai oleh kesederhanaan fizik bangunan, namun harus tetap menunjang peranan masjid ideal termaktub.

Secara umum peranan utama masjid zaman awal dan masa kini boleh dilihat dalam carta berikut:

## PERANAN UTAMA MASJID

Zaman Permulaan Islam	Masa kini
<p><b>Agenda Utama</b></p> <ul style="list-style-type: none"><li>- Pusat Ibadah</li><li>- Pusat Pembentukan Kehidupan Ummah</li><li>- Pusat Tarbiyah dan Pembentukan Peribadi Mulia</li><li>- Pusat Perpaduan Ummah</li></ul>	<p><b>Agenda Utama</b></p> <ul style="list-style-type: none"><li>- Pusat Ibadah</li><li>- Pusat Pendidikan Ummah</li><li>- Pusat Penyemaian Nilai-Nilai Keislaman</li><li>- Pusat Rujukan Informasi &amp; Maklumat</li></ul>

Akibat perkembangan negara-negara Islam dan kelainan corak dan sistem pemimpin-pemimpin Islam dalam zaman-zaman yang kemudiannya, maka peranan masjid yang

terdapat pada zaman Rasulullah Sallallahu Alaihi wasallam tidak lagi berlaku sepenuhnya. Ia lebih tertumpu sebagai tempat ibadat sembahyang, tempat mengaji dan tempat melaksanakan beberapa aktiviti kemasyarakatan yang sangat terbatas.

Keadaan yang telah berubah di atas menyebabkan timbulnya institusi-institusi baru yang mengambil alih sebahagian peranan masjid pada masa lalu itu, iaitu organisasi-organisasi keagamaan swasta di samping pihak kerajaan sendiri, sebagai pengarah kehidupan dunia dan ukhrawi umat beragama. Institusi-institusi itu memiliki kemampuan material dan teknikal melebihi masjid.

Manifestasi pemerintahan terlaksana di dalam masjid, baik pada pribadi-pribadi pemimpin pemerintahan yang menjadi imam/khatib maupun di dalam ruangan-ruangan masjid yang dijadikan tempat-tempat kegiatan pemerintahan dan syura (musyawarah).

Masjid-masjid pada zaman Rasulullah, Khulafa Rashidin dan zaman-zaman selepas itu walaupun sederhana dari segi pembinaannya akan tetapi telah dapat memenuhi segala keperluan untuk membangunkan umat Islam. Akan tetapi setelah mana kedudukan kelemahan umat Islam semakin ketara ditambah pula dengan perancangan-perancangan musuh yang tersusun telah dapat mengadakan perubahan besar di dalam masyarakat Islam, lebih-lebih lagi setelah berlakunya penjajahan ke atas negaranegara Islam. Semua kedudukannya turut terjajah yang menyebabkan lahirnya masyarakat Islam dalam rupa bentuk baru yang bersifat sekular. Maka berlakulah pemisahan antara agama dengan kehidupan masyarakat yang disogokkan melalui idiologi, nilai akhlak seterusnya sistem-sistem. Keadaan ini turut sama mempengaruhi semua struktur negara dan masyarakat.

Maka dalam hal ini masjid-masjid juga turut terjejas dan dengan itu masjid-masjid pada hari ini tidak dapat menjalankan fungsi-fungsi dan tugas-tugasnya seperti yang pernah dimainkan pada zaman-zaman awal Islam dahulu.<sup>17</sup>

Walaubagaimanapun, kedudukan masjid masa kini seperti digambarkan di atas bukanlah sesuatu yang menyediakan atau perlu dikasihani kerana sudah menjadi sunnatullah bahawa segala sesuatu pasti berubah dan peranan masjid pada hari ini juga

<sup>17</sup> Bandingkan: Md. Hashim bin Yahya, "Peranan Masjid Dalam Pembangunan Umat", kertas kerja dalam Muzakarah Pegawai-pegawai Pengurusan Masjid Peringkat Kebangsaan, Kuala Lumpur, 21 November 1991, hal. 7; Nik Ismah binti Hj. Nik Ab. Rahman, "Peranan Institusi Masjid Dalam Pembangunan Ummah" kertas projek Diploma Undang-Undang dan Pentadbiran Kehakiman Islam, Kulliyyah Undang-Undang Universiti Islam Antarabangsa Malaysia, 1993/1994, 61-2.

sudah berubah. Peranan masjid sekarang merupakan peranan ‘*back to barrack*’ dalam istilah ketentaraan kerana masing-masing fungsi dan peranan yang dimainkannya pada masa dahulu telah diambil alih oleh institusi-institusi khas. Peranan ketenteraan sudah diambil alih oleh institusi ketenteraan, peranan perubatan telah diambil alih oleh institusi kesihatan, peranan pendidikan sudah diambil alih oleh institusi pendidikan, peranan kehakiman diambil alih oleh institusi kehakiman dan seterusnya. Hal ini bukanlah sesuatu perkara yang bertujuan memandulkan fungsi dan peranan masjid akan tetapi ia bertujuan untuk mengembalikan semula fungsi dan peranan masjid kepada yang asal iaitu ‘tempat bersujud’.

Meletakkan dahi, kedua tangan, lutut, dan kaki ke bumi, yang kemudian dinamai sujud oleh syariat, adalah bentuk lahiriah yang paling nyata dari makna makna di atas. Itulah sebabnya mengapa bangunan yang dikhususkan untuk melaksanakan shalat dinamakan masjid, yang ertiannya “tempat bersujud.” Dalam pengertian sehari-hari, masjid merupakan bangunan tempat shalat kaum Muslim. Tetapi, karena akar katanya mengandung makna tunduk dan patuh, hakikat masjid adalah tempat melakukan segala aktiviti yang mengandung kepatuhan kepada Allah semata. Kerana itu al-Quran surat al-Jin: 18, misalnya, menegaskan bahawa, tafsirnya, “Dan bahawa sesungguhnya masjid-masjid itu untuk (ibadat kepada) Allah semata-mata, maka janganlah kamu seru dan sembah sesiapapun bersama-sama Allah.”<sup>18</sup>

Oleh itu, sudah sewajarnya institusi masjid pada hari ini menjadi satu institusi khas yang menjadi tempat peribadatan khusus seperti sembahyang dan kegiatan kegiatan yang bersesuaian dengan kedudukan masjid yang mulia dan suci. Peranan utama masjid masih kini dapat disimpulkan dalam hal-hal berikut:

- 1- Pusat Ibadah
- 2- Pusat Pendidikan Ummah
- 3- Pusat Penyemaian Nilai-Nilai Keislaman
- 4- Pusat Rujukan Informasi & Maklumat

---

<sup>18</sup> Bandingkan: Quraish, *Wawasan al-Quran*.

## **PERANAN IMAM DALAM MASYARAKAT**

Sebagai penggerak utama masjid, imam, tulis Kamal Izat Bin Ahmed, merupakan jawatan yang amat penting di dalam sesbuah masyarakat Islam. Imam adalah mewarisi peranan yang dimainkan oleh Rasullullah Sallalahu Alaihi wasallam sepanjang hidup baginda. Imam memainkan peranan yang cukup penting bukan sahaja dalam sembahyang malah berperanan penting dalam pembentukan masyarakat yang bertaqwah dan berdaya maju. Di antara beberapa peranan penting imam dalam masyarakat adalah seperti berikut:

### **1. Simbol Penyatuan Umat**

Imam dianggap sebagai simbol penyatuan ummat melalui ibadat solat berjemaah. Solat berjemaah adalah simbol bagi kesatuan umat dan simbol ketaatan umat kepada pemimpin. Melalui solat berjemaah setiap umat Islam mengenepikan segala bentuk perbezaan yang ada dan tunduk kepada seorang pemimpin iaitu imam. Konsep ini jika diguna pakai dalam segenap aspek kehidupan masyarakat sudah tentu akan dapat mewujudkan masyarakat yang bersatu padu. Melalui solat berjemaah juga mengajar umat Islam tentang adab terhadap kepimpinan seperti adab menegur kesilapan, adab menerima teguran dan adab menukar kepimpinan.

### **2. Penyelamat Umat**

Secara umumnya imam bolehlah dianggap sebagai penyelamat umat daripada menanggung dosa kerana meninggalkan Fardhu Kifayah. Hukum solat berjemaah bagi sesbuah kariah adalah fardhu kifayah. Ini bermakna jika sekiranya tidak ada dilaksanakan solat berjemaah maka keseluruhan ahli kariah akan menanggung dosa. Pada masa ini banyak terdapat masjid yang gagal menghimpun ahli kariah untuk menunaikan solat secara berjemaah terutamanya bagi waktu Zohor, Asar dan Subuh Sesetengah masjid hanya terdapat imam dan bilal sahaja yang datang bejemaah di masjid. Agak sukar untuk kita menyalahkan sesiapa memandangkan senario masa kini dimana tuntutan hidup yang semakin mencabar telah menyebabkan masyarakat semakin asyik dengan urusan seharian tanpa mempedulikan tuntutan Fardhu Kifayah ini. Ketika inilah imam memainkan peranan yang cukup besar bagi menyelamatkan masyarakat daripada menanggung dosa.

### **3. Pemimpin Masyarakat Setempat**

Imam tidak hanya sebagai pemimpin dalam solat berjemaah semata-mata, malah kepimpinan ini hendaklah merata dalam keseluruhan urusan hidup sehari-hari. Ini dapat dilihat dengan jelas melalui peranan imam-imam dalam urusan kenduri-kendara, kematian dan sebagainya. Dalam hal ini imam-imam hendaklah menunjukkan contoh teladan yang terbaik. Personaliti setiap imam juga haruslah sentiasa dijaga agar tidak dipandang rendah oleh masyarakat. Imam-imam hendaklah sentiasa kelihatan hebat pada setiap waktu dan ketika.

### **4. Sumber Rujukan Masyarakat**

Imam-imam juga mestilah menyediakan diri dengan ilmu yang mencukupi. Mereka bukan sahaja perlu mahir dalam ilmu-ilmu Fardhu Ain sahaja malah mestilah menguasai kemahiran lain seperti ilmu Psikologi, Kaunseling dan sebagainya. Biasanya imam menjadi pusat pengajian al-Quran bagi anak-anak di kampung.

Imam-imam juga boleh mengambil peluang menjadi guru ta'mir yang mengajar di masjid-masjid dan memberikan perkhidmatan khidmat nasihat agama di masjid. Selain daripada itu para imam juga boleh membuka kelas pengajian berkaitan agama dan kebudayaan Melayu seperti marhaban, berzanji, rebana, qasidah dan sebagainya. Jika usaha ini tidak dimulakan maka tidak mustahil jika suatu hari nanti ilmu-ilmu ini akan pupus ditelan zaman. Selain daripada itu para Imam juga perlu mahir dalam ilmu yang berkaitan dengan urusan keduniaan seperti ilmu pentadbiran, teknologi, teknologi maklumat dan sebagainya. Mereka harus boleh memberikan sedikit pandangan mengikut perspektif Islam berkenaan perkembangan semasa supaya masyarakat tidak terus keliru dengan isu-isu semasa yang sentiasa berkembang.

### **5. Penggerak Kegiatan Masyarakat**

Imam-imam mestilah dapat menjadi penggerak dan pemangkin bagi segala kegiatan masyarakat setempat. Baik atau buruk sesuatu masyarakat banyak bergantung kepada sejauh mana para imam berperanan. Mereka mempunyai peluang sekurang-kurangnya setengah jam seminggu untuk berucap dimana kesemua ahli kariah wajib mendengarnya.

Dalam hal ini Malik bin Nabi pernah menyebut, ‘keajaiban berlaku dalam dunia Islam di mana khatib dan makmum berpakaat dalam suatu perkara. Khatib tahu khutbahnya tidak begitu bermanfaat untuk makmum dan makmum tahu khutbah itu tidak begitu bermanfaat baginya. Tapi khatib bersetuju untuk terus berkhotbah dan makmum bersetuju untuk terus mendengar’. Inilah sindiran yang amat tajam yang mana jika kita mengambil iktibar akan dapat merubah keadaan masyarakat kita hari ini. Khatib mestilah membuat persedian rapi sebelum meniki mimbar pada hari Jumaat. Isi khutbah hendaklah dipastikan sentiasa sesuai dengan keadaan semasa dan menyentuh segenap lapisan masyarakat secara umum dan tidak ditujukan khusus kepada pihak tertentu sahaja. Ini akan menyakinkan jemaah tentang keikhlasan dan kejujuran Khatib dalam menyampaikan dakwah mereka melalui mimbar yang mulia itu.

Kesimpulannya imam-imam mestilah melengkapkan diri mereka dengan persediaan yang mencukupi agar dapat dicontohi dan diyakini oleh ahli-ahli kariah yang terdiri daripada berbagai peringkat masyarakat. Jika semua imam mampu memainkan peranannya dalam masyarakat maka pastinya kita akan dapat melahirkan masyarakat Islam yang bertaqwa dan berdaya maju.

### **PENILAIAN BERKAITAN DENGAN KEDUDUKAN MASJID SEBAGAI WADAH KEPIMPINAN RAJA: KONTEKS BRUNEI DARUSSALAM**

Imam atau ketua negara diwujudkan untuk mangganti Rasulullah Sallallahu Alaihi wasallam bagi melindungi agama serta mentadbir keduniaan (*siyasah al-dunya*). Hukum melantik seorang ketua negara untuk menjalankan tugas tersebut adalah wahib secara ijma’.<sup>19</sup>

Sepanjang sejarah Islam masjid-masjid selalu dekat dengan pentadbiran Negara sehingga kita mengenal Masjid Nabawi, Masjid Damsyik, Masjid al-Qurawain, Masjid al-Azhar dan lain-lain.

Di Brunei Darussalam, masjid-masjid sudah dibina dan didirikan semenjak penerimaan Islam sebagai asas kehidupan bernegaranya. Sejarah mencatat “Maka Sultan Sharif itulah kerajaan dinamai akan dia Peduka Seri Sultan dan ialah mengeraskan syariat

---

<sup>19</sup> Al-Mawardi, hal.. 4

Rasulullah Sallallahu Alaihi Wasallam dan berbuat masjid dan segala rakyat Cina berbuat kota batu.”<sup>20</sup>

Wadah kepimpinan raja yang disentuh dalam kertas kerja ini dan ia merupakan cara yang menonjol dalam memartabat dan mengukuhkan kedudukan institusi masjid di Brunei Darussalam, adalah Jabatan Hal Ehwal Masjid dan *Akta Majlis Ugama Islam dan Mahkamah-Mahkamah Kadi Penggal 77*.

Pengurusan dan pentadbiran masjid di Brunei Darussalam dilaksanakan dengan saksama, rapih, teratur dan berlandaskan kepada nilai-nilai keislaman dalam menghormati institusi masjid. Masjid-masjid di Brunei Darussalam ditadbir dan diurus di bawah kendali Jabatan Hal Ehwal Masjid, Kementerian Hal Ehwal Ugama.

Jabatan berkenaan mempunyai misi untuk menjadikan masjid pusat perkembangan ilmu pengetahuan dan pemikiran ke arah taqwa. Sedangkan matlamatnya adalah:

- Membuat pembaharuan dalam pembangunan, perancangan masjid dan projek-projek kegiatan.
- Membimbing ummah ke arah kemantapan akidah, ketaqwaan dan keilmuan.
- Meningkat fungsi dan perkhidmatan masjid terhadap masyarakat.
- Mengemaskinikan pentadbiran, pengurusan dan perancangan masjid.

Mengenai peranannya, laman web Jabatan berkenaan memaklumkan, ia:

- Bertanggungjawab dalam hal ehwal masjid.
- Bertanggungjawab dalam pentakmiran masjid.
- Bertanggungjawab dalam penyediaan khutbah-khutbah : Khutbah Jumaat, Khutbah 2 Hari Raya, Khutbah Gerhana, Khutbah Istisqaa dan lain-lain.
- Bertanggungjawab dalam merancang pembinaan masjid-masjid baru, penambahan/pengubahsuaian dan pemeliharaannya.

Manakala Komitmen Total Masyarakat, Pemimpin dan Intelek terhadap Masjid adalah:

---

<sup>20</sup> Dato Prof. Mahmud Saedon, *Jejak-jejak*, 232.

- Komitmen masyarakat bererti bahawa mereka senang membuat penyertaan dan memberikan sokongan terhadap program Masjid. Ini wujud kerana kepercayaan mereka terhadap keupayaan dan kewibawaan Masjid.
- Komitmen pemimpin bererti adanya perhubungan yang murni antara pemimpin dengan Masjid. Perhubungan itu mewujudkan kekuatan kepimpinan kepada pemimpin dan pada Masjid. Dengan yang demikian wujudlah keadaan dimana pemimpin dan masyarakat dalam menunaikan keperluan dan kepentingan mereka sentiasa mendapat saringan Masjid yang mendapat kekuatan dari perhubungan dengan pemimpin itu tadi.
- Komitmen Intelek bererti bahawa mereka bersedia menjadi sumber kekuatan organisasi Masjid. Kalau komitmen pemimpin memberikan "*Political Will*" kepada Masjid, maka komitmen intelek memberikan "*Intellectual Will*"

Masjid di Brunei Darussalam dibahagikan kepada kategori berikut:

1. Masjid Negara iaitu Jame' 'Asr Hassanal Bolkiah dan Masjid Omar Ali Saifuddien
2. Masjid Utama untuk jemaah lebih dari 2000 orang
3. Masjid Mukim untuk jemaah antara 800-1800 orang
4. Masjid Qaryah untuk jemaah kurang dari 500 orang
5. Surau/Balai Ibadat untuk mendirikan Jumaat<sup>21</sup>

Pembahagian masjid kepada beberapa kategori sudah dikenal dalam sejarah dan fiqh Islam. Kategori-kategorinya ialah:

1. al-Masjid al-Haram
2. al-Masjid al-Nabawi
3. al-Masjid al-Aqsa
4. dan masjid-masjid selain daripada tiga masjid tersebut.

Al-Mawardi membahagikan kategori masjid kepada:

1. Masjid Negeri (*Masjid Sultaniyyah*), dan
2. Masjid biasa (*Masjid 'Amiyah*)

---

<sup>21</sup> Dato Prof. Mahmud Saedon, *Jejak-jejak*, hal. 233.

Masjid negeri ialah masjid merupakan masjid jami' yang ramai pengunjungnya yang dikelolakan oleh pemerintah.<sup>22</sup> Dan masjid biasa adalah "masjid yang didirikan oleh orang ramai, maka tiada campur tangan pemerintah dalam perlantikan imam-imam masjid ini."<sup>23</sup>

Di samping Jabatan Hal Ehwal Masjid, Negara Brunei Darussalam juga mempunyai perangkat undang-undang yang mengatur pentadbiran masjid. Ia bertujuan untuk penyelarasan dan keteraturan pentadbirannya. Undang-undang ini termaktub dalam *Akta Majlis Ugama Islam dan Mahkamah-Mahkamah Kadi Penggal 77*.

Masjid-masjid diperuntukkan dalam Bahagian V dengan 11 bab dari Bab 123 hingga Bab 133. Perinciannya adalah sebagai berikut:

123. Majlis menjadi pemegang amanah
124. Sekatan ke atas masjid-masjid baru
125. Pembaikan-pembaikan
126. Penutupan atau perobohan
127. Sempadan-sempadan mukim
128. Daftar pegawai masjid
129. Lantikan Imam
130. Lantikan pegawai masjid yang lain
131. Pemecatan pegawai masjid
132. Kuasa-kuasa dan tugas-tugas
133. Kehadiran di masjid.

Agar tidak ada pembangunan masjid liar *Akta* memerlukan "(1) Tiada siapa pun boleh mendirikan mana-mana masjid atau mewakafkan atau menggunakan sebaliknya mana-mana bangunan yang ada, sebagai atau bagi maksud-maksud sebuah masjid, tanpa kebenaran bertulis daripada Majlis."<sup>24</sup>

Agar tidak timbul perselisihan mengenai siapa imam *Akta* dalam bab 129 memperlukan:

---

<sup>22</sup> *Al-Ahkam al-Sultaniyyah*, 171

<sup>23</sup> Ibid. hal. 174.

<sup>24</sup> Bab 124. "Majlis" dalam bab ini bermaksud "Majlis Ugama Islam yang ditubuhkan di bawah bab 5". manakala bab 5 dari *Akta* berbunyi "Hendaklah ditubuhkan sebuah Majlis Ugama Islam yang dipanggil dalam bahasa Inggeris "The Religious Council."

“(1) Kebawah Duli Yang Maha Mulia boleh melantik sesiapa saja yang sihat dan sempurna untuk menjadi Imam bagi mana-mana masjid.

(2) Setiap orang yang dilantik untuk menjadi Imam hendaklah menerima suatu Tauliah di bawah meterai Kebawah Duli Yang Maha Mulia.”

Peruntukan di atas menjadi bukti bagaimana pentingnya kedudukan imam dan peranannya kerana dia menjadi wakil ketua negara dalam mengimamkan sembahyang para jemaah menghadap Allah Subhanahu Wata’ala. Kedudukan ini sama dengan kedudukan petinggi negara yang menjadi wakil ketua negara menjalankan tugas kenegaraan dunia sedangkan imam melaksanakan perwakilan ketua negara berkaitan dengan urusan ukhrawi. Kerana, seperti disentuh di atas, salah satu tugas ketua negara adalah mengimamkan sembahyang berjemaah kerana dia adalah wakil Rasulullah Sallallahu Alaihi Wasallam.

Oleh itu, pelantikan imam sembahyang mempunyai bab khusus dalam kitab al-Mawardi di atas. Sedangkan kitab ini membincangkan tugas-tugas ketua negara dalam Islam. Masing-masing imam dalam setiap kategori yakni sembahyang lima waktu, Jumaat dan sunat, mempunyai tugas-tugas tersendiri. “Jika sekiranya,” al-Mawardi menulis, “pemerintah telah melantik seorang imam untuk masjid itu, maka dia adalah berhak menjadi imam di situ dari orang lain walaupun orang lain itu lebih baik dan lebih berilmu daripadanya.”<sup>25</sup>

Syarat-syarat seseorang untuk boleh dilantik menjadi imam menurut al-Mawardi ialah seorang lelaki, bersifat adil, seorang qari’ (menghafal al-Quran secukupnya), seorang faqih dan tiada cacat dalam sebutan atau gagap.<sup>26</sup>

Tugas berat dan mulia imam dalam *Akta* dapat kita semak dalam bab 133 mengenai kehadiran di masjid di mana ia menyatakan:

“Anak mukim<sup>27</sup> dari mana-mana mukim hendaklah biasanya menghadiri masjid dalam mukim<sup>28</sup> itu, tetapi mam masjid itu boleh atas alasan yang baik memberi kebenaran kepada sesiapa saja untuk menghadiri masjid lain dan, jika Imam tidak

<sup>25</sup> *Al-Ahkam al-Sultaniyyah*, hal. 171.

<sup>26</sup> Ibid. hal. 173

<sup>27</sup> ‘Anak mukim’ bermakna orang-orang yang bermastautin secara tetap atau lazimnya tinggal dalam mana-mana mukim masjid.

<sup>28</sup> ‘Mukim’ dan ‘mukim masjid’ bermakna kawasan yang disediakan oleh Majlis menurut Akta ini dalam mana sebuah masjid ditempatkan.

memberi kebenaran demikian, Jawatankuasa Kehakiman boleh memberinya atas nama dan bagi pihak Majlis.”

Pada masa kini, menurut hemat penulis, ada baiknya jika imam-imam disyaratkan mempunyai diploma lepasan ijazah khas mengenai keimaman sebagaimana disyaratkan ke atas beberapa kerjaya syarat diploma mengenai kerjaya berkenaan seperti syarat Diploma Perundangan Islam dan Guaman Syar'i yang dikendalikan Institut Pengajian Islam Sultan Haji Omar Ali Saifuddien, Universiti Brunei Darussalam bagi pengamal undang-undang di Negara Brunei Darussalam. Persyaratan ini dikenakan kerana mengambil kira kedudukan dan peranan imam yang penting di mana dia menjadi hujung tombak wawasan kepimpinan raja dan sosok yang selalu bertemu dengan khalayak ramai.

Lebih elok lagi agar Brunei menjadi tumpuan pelajar luar Negara, IPISHDAS, UBD membuka kursus Diploma Imam dan Pentadbir Masjid untuk keperluan institusi masjid di Brunei khasnya dan rantau ini amnya. Diploma ini dijangkakan akan menarik perhatian pihak-pihak berwajib dan tertentu yang mengurus dan mentadbir masjid-masjid luar negara yang berjumlah ratusan ribu buah masjid. Maka dengan mengambil inisiatif membuka kursus ini, UBD akan menjadi pusat pengajian diploma imam dan pentadbir masjid kerana diploma semacam ini, sepengetahuan penulis, belum ada di rantau ini. Dengan adanya kursus ini di UBD, pelajar-pelajar luar Negara sebagai calon imam-imam di negara masing-masing akan lebih mengenal lagi Brunei Darussalam sebagai negara yang berideologikan Melayu Islam Beraja.

Di samping diploma imam di atas, keperluan memperkasa pertadbiran masjid juga boleh dilaksanakan menerusi program-program pemantapan *Human Resource Development* (HRD). UBD menerusi Fakulti Pengajian Ekonomi, Pentadbiran dan Dasar ada membuka kursus untuk program pemantapan pegawai-pegawai kanan dan mengengah kerajaan. Seandainya mereka juga diminta untuk membuka kursus semacam bagi pentadbir-pentadbir masjid untuk memantapkan kerjaya mereka, sudah tentu ia akan meningkatkan lagi taraf sumber daya manusia (HRD) di institusi masjid tempatan, bahkan luar negara seandainya ia dibuka kepada pentadbir-pentadbir masjid luar negara.

Pemantapan HRD pentadbir-pentadbir masjid di atas diperlukan memandangkan tugas-tugas mereka yang tidak ringan dalam institusi masjid. Peruntukan *Akta* dalam bab 132 mengenai kuasa-kuasa dan tugas-tugas pegawai masjid menyatakan:

“Pegawai masjid bagi mana-mana masjid hendaklah mempunyai kuasakuasa dan tugas-tugas sebagaimana yang ditentukan dalam Tauliah-Tauliah mereka masing-masing dan selain daripada itu-

- a) hendaklah bertanggung jawab bagi perjalanan dan aturan yang baik bagi masjid tersebut;
- b) hendaklah bertanggung jawab bagi perjalanan yang baik bagi anak mukim masjid tersebut dalam perkara-perkara yang berhubung dengan ugama Islam; dan
- c) hendaklah dengan segera memberi makluman kepada Masjlis mengenai semua perkara yang terbit dalam mukim mereka dan yang memerlukan perhatian Majlis.”

Pengurusan dan pentadbiran masjid masa kini khasnya di Brunei Darussalam mestilah mengikuti kepiawaian antarabangsa dan diselaraskan dengan corak pentadbiran falsafah MIB agar masjid tidak dianggap tidak mempunyai kharisma. “Konsep pengurusan biasa banyak mengambil kira perkara-perkara seperti *theory of human basic needs, job satisfaction, motivation and incentives* dan *participatory management concepts* ternampak dari insiden-insiden yang berlaku di sana-sini, teori-teori ini belum lengkap. Masih terdapat kekosongan untuk mewujudkan persekitaran yang mantap bagi maksud pentadbiran yang dinamik.... Yang kurang adalah pembangunan kerohanian yang menimbulkan pelbagai ketidaktentuan. Corak pentadbiran filosofi MIB mengambil kira bukan hanya nilai-nilai luaran tetapi juga nilai-nilai dalaman.”<sup>29</sup>

## PENUTUP

Fungsi dan peranan masjid besar seperti yang disebutkan pada masa keemasan Islam itu tentunya sulit diwujudkan pada masa kini. Namun, ini tidak berarti bahwa masjid tidak dapat berperan di dalam hal-hal tersebut.

---

<sup>29</sup> Awang Haji Mohd. Salleh bin Haji Hidup (Dato Seri Laila Jasa), “Penyerapan MIB Dalam Pentadbiran”, dalam *Melayu Islam Beraja*, ctk I, (Brunei Darussalam: Akademi Pengajian Brunei, 1993), hal.142-43.

Masjid harus mampu melakukan kesepuluh peran di atas yang disesuaikan dengan keadaan dan keperluan semasa. Paling tidak melalui uraian para pemininya guna mengarahkan umat pada kehidupan dunia dan ukhrawi yang lebih berkualiti.

Apabila masjid dituntut berfungsi membina umat, tentu sarana yang dimilikinya harus tepat, menyenangkan dan menarik semua umat, baik dewasa, kanak-kanak, tua, muda, pria, wanita, yang terpelajar maupun tidak, sehat atau sakit, serta kaya dan miskin.

Satu perkara yang perlu mendapat perhatian, karena menurut pengamatan sementara pakar, sejarah kaum Muslim menunjukkan bahawa perhatian yang berlebihan terhadap nilai-nilai arsitektur dan estetika suatu masjid sering ditandai dengan kedangkalan, kekurangan, bahkan kelumpuhannya dalam pemenuhan fungsi-fungsinya. Seakan-akan nilai arsitektur dan estetika dijadikan kompensasi untuk menutup-nutupi kekurangan atau kelumpuhan tersebut.

Daripada apa yang dibincangkan dalam kertas kerja ini dapatlah diambil kesimpulan beikut:

- Peranan dan fungsi masjid mempunyai nilai kesejagatan. Ia boleh dilaksanakan di mana-mana tempat di muka bumi ini.
- Peranan dan fungsi masjid yang sebenarnya hendaklah dioptimakan dan dilaksanakan sepenuhnya dengan mengambil kira keadaan dan suasana yang ada dewasa ini demi untuk membangun umah dan negara
- Dalam sejarah Islam hubungan ketua negara dan masjid tidak pernah terpisahkan kerana masjid merupakan satu cara penyampai kepimpinan ketua negara. Hubungan keduanya bagaikan hubungan penghuni rumah dan rumahnya kerana ia adalah tugas keagamaan.
- Penggubalan undang-undang masjid merupakan satu kemestian demi menjaga kesucian dan kemuliaan masjid agar ia tidak disalahgunakan oleh pihak-pihak yang tidak bertanggung jawab. Ia juga untuk penyelarasaran pentadbiran dan pengurusan masjid.
- Penubuhan satu jabatan yang menguruskan pentadbiran masjid merupakan satu keperluan asas masa kini agar pengurusan masjid menjadi lebih saksama, teratur, rapih dan berkesan.

- Para pentadbir masjid hendaklah mengoptimakan pelaksanaan kuasa-kuasa dan tugas-tugas mereka seperti yang dikehendaki oleh agama Islam dan apa yang tertuang dalam perundang-undangan negara demi menyemarakkan peranan dan fungsi masjid.
- Masyarakat dipanggil untuk memahami lebih mendalam tentang peranan dan fungsi masjid agar usaha masjid untuk membentuk individu dan masyarakat serta negara ke arah penghayatan Islam, terlaksana dengan jayanya.

Untuk menjayakan kesimpulan di atas dalam konteks wadah kepimpinan raja masa kini, dicadangkan:

1. Penyatuan visi dan misi masjid-masjid.
2. Pengkhususan sebahagian masjid dalam menangani perkara-perkara tertentu dalam bidang-bidang pendidikan, penyebaran ilmu dan sosial.
3. Pembukaan kursus Diploma Imam dan Pentadbiran Masjid
4. Pelaksanaan program pemantapan pentadbir-pentadbir masjid

Apa yang baik hanya dari Allah Subhanahu wata'ala semata dan apa yang buruk hanya dari penulis semata *wa astaghfirullah*.

Wallahu A'lam

## RUJUKAN

1. al-Quran al-Karim.
2. Abdul Hamid Mutawalli, *Mabadi' Nizam al-Hukm fi al-Islam*, cet. 4 (Iskandariyyah: Mansha'ah al-Ma'arif, 1978)
3. Abu al-Hasan Ali bin Muhammad al-Mawardi, *al-Ahkam al-Sultaniyyah wa al-Wilayah al-Diniyyah*, terj. Uthman bin Hj Khalid (Kuala Lumpur: Institut Pengajian Tradisional Islam, 1989)
4. *Akta Majlis Ugama Islam dan Mahkamah-Mahkamah Kadi Penggal 77*
5. Awang Haji Mohd. Salleh bin Haji Hidup (Dato Seri Laila Jasa), “Penyerapan MIB Dalam Pentadbiran”, dalam *Melayu Islam Beraja*, ctk I, (Brunei Darussalam: Akademi Pengajian Brunei, 1993)
6. Awang Mahmud Saedon bin Awang Othman (Dato Paduka Seri Setia Profesor Dr. Haji), *Jejak-jejak... Penyelenggara Prof. Madya Dr. Awang Haji Hashim bin Haji Abd. Hamid* (Gadong: Akademi Pengajian Brunei, UBD, 2003)
7. ASESCO, *al-Mu'jam al-'Arabi al-Asasi* (Tunis: Larousse, 1989)
8. Dewan Bahasa dan Pustaka, *Kamus Dewan* (Kuala Lumpur: Dewan Bahasa dan Pustaka, 1989)
9. Faidullah al-Maqdisi, *Fath al-Rahman li Talib Ayat al-Quran* (Beirut: Dar al-Fikr, 1409H/1989M)
10. M. Quraish Shihab (Dr.), *Wawasan al-Quran* Tafsir Maudhu'i atas Pelbagai Persoalan Umat (Bandung: Mizan)
11. Md. Hashim bin Yahya, “Peranan Masjid Dalam Pembangunan Umat”, kertas kerja dalam Muzakarah Pegawai-pegawai Pengurusan Masjid Peringkat Kebangsaan, Kuala Lumpur, 21 November 1991.
12. Muhammad al-Sais, *Tafsir Ayat al-Ahkam* (Kaherah: Muhammad Ali Shubaih, tt)
13. Nik Ismah binti Hj. Nik Ab. Rahman, “Peranan Institusi Masjid Dalam Pembangunan Ummah” kertas projek Diploma Undang-Undang dan Pentadbiran Kehakiman Islam, Kulliyyah Undang-Undang Universiti Islam Antarabangsa Malaysia, 1993/1994.
14. Webster's – New Dictionary and Thesaurus (USA: DS Max USA, 1995)
15. Zakaria Stapa, Fungsi dan Kegunaan Masjid Simbol Perpaduan Ummah